

بِسْمِ اللَّهِ الرَّحْمَنِ الرَّحِيمِ



# Khutba Jummah

Hazrat Khalifatullah Munir. A. Azim (atba)

29 Novembre 2019  
02 Rabi'ul Aakhir 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

## HADITHS LOR LE GHIBBAT... (PARTIE 1)

*Alhamdulillah, Summa Alhamdulillah*, aujourd'hui mo contigner mo série de Khutba lor « *Ghibbat* » (la médisance, faire palabre etc.). Et couma mo ti dire zot, mo vine maintenant avec bane Hadiths lors le sujet.

Nous bizin conner, ki même dans rapporte Hadiths, nous bizin faire bien attention, attention nous pas pé rapporte bane paroles du Saint Prophète Hazrat Muhammad (saws) couma bizin. **Par exemple** : Hazrat Abu Huraira (ra) rapporter ki Hazrat Muhammad (saws) fine dire ki le plus mauvais dimounes c'est bane ki ena deux la bouche. C'est-à-dire li vine ici li dire ene causer et ler li alle là-bas li dire ene lot causer. En d'autres mots, li ene grand hypocrite et ene palabreur. Hypocrite et palabreur là c'est sa traducteur ki pé dire sa causer là. Sinon dans causer originale là péna sa bane mots là. Li fine mette li façon ki li fine comprend li. Quoique pratiquement li veut dire sa même. Mais nous bizin faire bien attention dans bane traductions, ki premièrement nous bizin dire la traduction exacte et ensuite nous capave dire ki li veut dire tel zaffaires.

C'est pourquoi kan nous ré-alle vérifier sa Hadith là, c'est en effet pas bane mots exacte du Hadith. Kan nous jette ene coup d'œil lors le Hadith, vraiment péna sa bane mots là. Hadith là li juste coumsa : « **Pli pires de bane dimounes c'est bane ki ena deux (double) visages. Zot présente ene visage devant ene, et ene l'autre visage devant ene l'autre (dimoune).** » (Bukhari, Muslim).

En ce ki concerne la conclusion ki tirer de sa, c'est ki quoi ki dans premier choix de bane mots ki mo fine mentionner, quoi-ki li veut dire presque la même chose, deux visages et deux la langues, deux la bouches, mais en vrai dire, paroles ki fine servi c'est : deux visages.

Pareil, hors de contexte de bane Hadiths, kan ene palabreur ena pou fer so palabre, sois li alle ajoute ou retire bane mots de bane paroles originale d'ene dimoune, kot alors li change la tournure de sa parole là.

Kan nous guette maintenant sa Hadith kot Hazrat Muhammad (saws) fine mentionne ki bane plus pires parmi bane dimounes c'est bane ki ena deux visages, sa c'est parski sa malédiction de double visage là li reste lier avec la traîtrise (faire traître avec quelqu'un) et li vine couma dire ene partie intégrante de sa.

Kan nous guette sa situation de palabres là dans so globalité, nous trouver ki bocou désordre créer en raison de bane palabres. Parfois li rentre dans bane famille bien proches et parfois li arrive jusqu'à kot relation couper, parfois relation de sang même couper d'ene tel façon ki li vine bien difficile pou relier zot.

Peut-être zot tous fine bizin témoigne sa bane zaffaires là. Moi autant ki mo pé rappel bane incidents ki fine vine devant moi, mo trouver ki sa deux zaffaires là zot bien lier. Puisque sa c'est ene zaffaire ki pli commun parmi bane madames, alors avec tout mo excuses à bane madames [mo pas pé pinpoint quique ce soit], mo pé donne ene exemple en générale de bane madames, quoi-ki parmi missiés aussi ena li bocou.

Ki faire mo dire ena li parmi bane madames plisse ? La raison c'est ki ene madame kan li dire ene zaffaire lors ene lot madame, et kan arriver ki sa causer là arrive jusqu'à lot madame là, alors tournure de sa paroles ki li fine causer là li changer et kan sa l'autre madame là tende sa nouvo parole là, li blesser ou offenser ou

encolère à cause sa bane paroles là, prend dépi sa dimoune ki fine dire sa parole là en premier pou vine jusqu'à li, alors parole là fine empirer. Li fine vine pli amère. Zot fine ajouter avant ki alle propage sa. Mais parfois zot raconte li exactement couma fine dire. Mais causer là li tel ki certainement li pou gâte relation entre sa deux dimounes là.

Kan premier dimoune là pé tanne sa, bé li faire promesse ki : « *Mo pas pou dire sa personne* ». Donc, premièrement c'est li ki ena deux visages, c'est-à-dire li tanne causer là et ensuite sans aucaine hésitation li fanne sa. Li attaque sa madame là. Li casse tout promesse ki li fine faire. Donc, li vine deux la langue aussi et celui ki alle rapporte sa là, déjà avant même li deux la langues, parski kan li ti dans réunion et li ti pé tanne sa zaffaire là, bé li ti couma ene *Amaanat*. Li pas ti bizin alle rapporte sa. Même si li demander pou na pas alle propage sa, ou non, ou pas ti bizin faire li. Parski normalement kan ene dimoune pé dire ene zaffaire lors ene lot et surtout si li ene mauvais zaffaire, bé li atanne ki ou pas pou alle rapporte sa. C'est alors avec confiance ki li pé dire ou sa, parceki si ti ena pou dire, bé ki faire sa lot dimoune là même pas dire li, c'est-à-dire, sa dimoune ki en premier fine aborde sa causer là avec les autres.

Donc, au départ même ena deux visages. Ene deuxième dimoune fine tanne sa et à so tour li fine dire ene lot, lot là fine alle rapporte sa, sa dimoune concerner là. Et ler dimoune concerner là vini pou la guerre, bé là aussi li fine ene zaffaire de deux la langues. Et sa continuer pli devant, kot lot là pou dire ki « *Celui ki fine dire ou sa fine cause menti. C'est pas sa ki mo fine dire. Mais c'est sa zaffaire là ki mo ti dire.* » Et de là-bas ene 3<sup>ème</sup> série de mensonge commencer. Et beaucoup de fois, même si li fine dire sa parole là, bé ler dimoune là vine demande li, li tire ene lot signification de céki li fine dire et li démenti rapporteur là. Lerlà lot là pou vini et pou donne toute sorte de malédiction et li pou dire ki « *C'est sa même ki to ti dire* ». Li pou dire « *Non, mo pas ti dire sa* ».

Donc, kan ene la bouche vine deux la bouche, bé li pou continuer causer aller même. Lerlà li vine difficile pou refaire sa vine ene la bouche encore. Et dans sa bane désordre là, pli grand difficulté c'est celui ki ena pou prend décision là. Parceki tout témoignages fine casser en morceau. Et même dimoune là pou admettre ene partie là-dans et alors li pou expliquer ki : « *Ler mo ti dire sa, c'est pas sa ki mo ti ouler dire mais c'est sa ki mo ti envie dire* ».

Pareil couma bane politiciens d'aujourd'hui faire. Lors chaque déclaration zot aussi zot ena deux visages bane pauvres diables là. Donc, sa zaffaires de deux visages ki Hazrat Muhammad (saws) fine dire là li bien profond. Et avec sa beaucoup bane maladies de la société vine bien ouvert clairement devant nous, céki permette nous trouve bane solutions. Et solution c'est sa, ki ou reste épargner de sa bane zaffaires de tender et rapporte bane causer là et rapporte li dans ene façon déformer.

Premièrement si ou trouve ene défaut dans quique frère ou sœur, bé ou bizin ou même dire li. Lerlà li vine ene zaffaire d'ene la bouche. Et si lèrlà li tanne sa li en colère, bé li possible ki ou fine mal dire li, ou fine dire li dans ene mauvais façon. Mais généralement si ou ouler dire li sa dans ene façon sympathie, bé li pas pou crée aucaine désordre. Et si zamais arrive quique problème aussi, bé c'est celui ki fine tender là ki responsable. Ou soi c'est celui ki fine dire zaffaire là ki responsable. En apparence ou fine dire sa avec bon l'intention mais au fait dans le cœur ou ti envie blesse li. Ler sa alle pli devant, lèrlà bizin bien analyse sa. Ena bane dimounes dire ki ou ena tel défaut et zot dire ki « *Mo pé dire ou parski moi mo habituer cause la vérité, et mo pé dire ou la vérité* », mais ena so façon pou dire ene zaffaire vrai !

Et Hazrat Muhammad (saws) fine montrer nous tous bane façons. Péna aucaine aspect de nous la vie lors laquelle li pas fine dire nous sa bien ouvertement et clairement. Si li ene zaffaire vrai mais ki en même temps bien amère, bé alors Hazrat Muhammad (saws) dire ki ou péna droit alle propage sa causer là. Maintenant si li ene zaffaire menti, bé sa li ene fausse accusation. Ene blâme. Mais le sujet de palabres li ena connexion avec bane zaffaires vrai. Mais parfois même dans bane zaffaires vrai ena bane mensonges. Sa c'est ene sujet à part. En fait Hazrat Muhammad (saws) pé dire, si ene quelqu'un pé cause avec ene lot dimoune lors défaut d'ene 3<sup>ème</sup> dimoune, celui ki fine dire causer là aussi vrai et celui ki fine alle rapporte sa aussi vrai mais action de rapporter et propage sa ki mauvais et li fausse et vilain. Li tellement ene vilain action ki Hazrat Muhammad (saws) fine dire ki couma dire ene quelqu'un fine envoye ene coup de flèche lors ene dimoune et li ti envie vise et gagne so l'estomac. Mais li pas fine gagne so l'estomac et flèche là fine alle tombe kot li pied dimoune là. Mais celui ki rapporter là li couma dire li prend sa flèche là en bas et li fonce sa dans l'estomac dimoune là. Li dire dimoune là ki sa flèche là ti bizin rentre ici même sa. De ki droit ki li fine alle ramasse sa enba et perce sa dimoune là ? Donc, li ene pli grand

criminel. Premier dimoune ki fine faire sa là peut être li fine faire sa dans ene moment de colère. Sans conner si pas li permette ou pas li pas permette, li fine faire sa dans ene moment de colère. Mais celui ki fine rapporter là li couma dire li pé commette ene crime froidement, sans aucaine raison. Li penser ki puisque c'est ene zaffaire ki fine fini dire lors sa dimoune là, alors « *li mo devoir alle rapporte li sa* ».

Donc, Hazrat Muhammad (saws) fine explique sa bien clairement et ouvertement, li dire ki la vérité, honnête li ene très bonne chose mais dans ki bane places pou servi li? Hazrat Muhammad (saws) dire ki : **bane zaffaires ki moi mo dire et ki en fait ena connexion avec la société, c'est bane bon causer et li ene *Amaanat* pou la société.** À ce moment là li vine ou devoir pou propage sa pli devant. Sa c'est ene aspect d'*Amaanat* ki ena connexion avec tanne bane causer et propage li pli devant. Mais ena ene lot aspect de sa, c'est ki si ou fini tanne ene zaffaire dans ene réunion, ou péna le droit alle propage sa en dehors sans la permission de sa quelqu'un ki fine dire sa là. Sa aussi Hazrat Muhammad (saws) fine classe li comme ene *Amaanat*. Li dire ki bane causer ki dire dans ene réunion, li ene *Amaanat* même. Kan même fine dire ou ene *Amaanat* ou soi pas fine dire li, sa reste toujours ene *Amaanat* même. Hadith vers laquelle mo pé référer li trouve dans Tirmidhi, *Kitab-ul-Bir*.

Jabir bin Abdullah (ra) rapporter ki Hazrat Muhammad (saws) fine dire, kan quelqu'un pé dire ene zaffaire ensuite à cause so l'attention fine attirer vers ene lot zaffaire et li pas réussi terminer céki li ti pé dire avant là et li pas fine gagne l'occasion dire ou si pas li ene zaffaire ki capave raconter ou pas, bé sa demi causer ki li fine dire, sa aussi reste ene *Amaanat*. Et si li ene *Amaanat*, bé ou bizin bien garde li et sans so permission ou pas gagne droit alle fanne sa en dehors.

Donc, sa c'est ene principe générale, mais concernant céki mo pé dire zot, c'est pou zot propre bienfaits. Donc, tout céki mo dire zot vine ene *Amaanat* pour toute la nation. En conséquence, bane ki tanne sa de moi li zot devoir pou alle rapporte sa bane ki absents. Donc, de deux cotés fine servi le même mot : *Amaanat*. Mais signification changer.

Généralement bane causer de bane réunions de tous les jours zot reste ene *Amaanat*, même ou pas gagne droit alle fanne sa en dehors sans permission. Parfois mo fine trouver ki même dans nous la caze kan nous pé causer coumsa,

sans aucune formalité à l'heure de repas, nous cause certaines zaffaires. Bé ena bane dimounes ki ti présent à ce moment là, zot alle fanne sa en dehors. Et parfois zot fanne li dans ene façon déformer. Et causer là aller même. Mo même mo surpris et mo penser kan mo fine capave dire bane tel choses? À ce moment là, mo fine alle conner ki à l'heure de repas mo fine dire bane zaffaires ki pas ti approprier pou être connu du publique, parski dans céki mo ti pé dire là, ti ena bane dimounes ki péna aucune connexion avec le Jamaat ki concerner. Et sans zot permission mo pas ti gagne droit pou faire la masse en générale conne bane tel tel zaffaires. Parceki attention zot ti capave blesser par sa. Quoi-ki c'était pas bane mauvais causer di tout et non pli li ti bane causer ki pé contraye zot, non. Mais kan même li ti ene *Amaanat* are moi mais bane dimounes ti tanne tout sa là et zot fine alle propage sa pli devant. Et lirlà zot fine propage li, zot fine propage li dans ene façon déformer. Et sa montrer ki l'envie sa bane dimounes là ena et couma zot prend plaisir dans fanne bane causer ki li pas vrai et sa montrer ene parti de zot caractère même. Bane tel kalité dimounes de nature même zot ena deux visages, deux la langues. Puisque zot envie faire sa paraître intéressant pou dimounes écoute zot, zot ajouter et zot exagérer beaucoup. Zot rentre dans ene bassesse terrible et céki étonnant là-dans, dans bane mensonges, dimounes prend plaisir pou écouter et zot croire dans sa bane mensonges là, et concernant kitchoses de vérité, sa zot faire sourd d'oreille et zot dire ki pé cause menti (vérité vine mensonge et pou zot mensonge vine la vérité).

Voilà guette ki arrive Jamaat Ahmadiyya de Maurice azordi, kan *ex-so-called Amir* fine envoie so rapport en l'an 2000 remplie de fausseté et certain bane membres *Majlis-e-Amila* de Maurice à sa l'époque fine soutenir sa mensonge là et fine laisse sa rentre dans Londres devant le regretté 4<sup>ème</sup> Calife (Hazrat Mirza Tahir Ahmad). Sa bane ki autour du *Khalifa* là et parmi ena ene ki ti pé prend li-même comme *Khalifa*, ene mauricien ki ti autour *Khalifa* là-bas et fine gagne aussi le *Additionnal Wakilut-Tabshir*, tous sa là fine support sa bane gros mensonges et la haine là, kot voilà le *Khalifa* kot Allah fine donne li deux zoreilles pou écoute deux coté, mais alors sans li écoute nous, li expulser nous, mette en dehors du Jamaat et voilà kot mensonges, 2 visages, 2 la langues fine amène Jamaat Ahmadiyya et aussi guette tous sa bane ki fine soutenir sa bane mensonges là, ki fine arrive zot ! Alors, nous faire attention pas vine pareil. *Insha-Allah* la semaine prochaine mo pou continuer le Khutba Jummah lors sa même sujet là.

## ANNONCES

1. Par la grâce d'Allah, dépi mo fine sorti Madagascar mo fine rentre à Maurice et bane travaux ki fine faire dans Madagascar, ki mo ti mentionner vendredi dernier le 22 Novembre 2019, mo fine recevoir plusieurs messages à travers le monde entier, kot, kot ena mo bane disciples, zot fine montrer zot contentement, zot fine exprime zot dans ene façon extraordinaire kot mo-même mo fine bien émotionner.

*Alhamdulillah Summa Alhamdulillah, c'est bane dimounes ki ena ene l'amour extra pour Allah (swt) et Allah So Khalifa (le Khalifatullah). Ena bocou fine exprime zot sentiments, zot l'amour, appréciation et aussi ene l'envie ki Allah (swt) So choisi vine dans zot pays aussi et vine visite zot et reste avec zot pour kot zot aussi zot profite Allah (swt) So messenger parmi zot.*

Pour mo réponne tous mo bane très chers disciples ki fine envoye moi sa bane messages là et ki trouve dans différents pays dans le monde, donc, mo fine penser ki mo donne zot tous zot réponse de zot messages azordi après le Khutba Jummah *[lors Ghibbat]*.

Vraiment li touchant kan lire sa bane messages là et sa donne moi ene tristesse, mais li bien difficile ; mo pas pour dire impossible, mais actuellement li difficile pour vine visite zot – ena fine dire moi ki : *« Ene seul fois ou fine vini et guette combien l'années fine passer, ou pas fine ré-vine guette nous encore »* et les autres dire : *Ô Khalifatullah, nous fine croire dans la Manifestation Divine et reconnaite ou comme Allah So Khalifa dans sa siècle là. Ou pas encore même vine rendre nous ene visite ici et nous pé attane ou sak moment avec impatience. Nous envie nous aussi gagne sa bénédiction divine là, kot Allah So bien-aimé Khalifa parmi nous. Ô Huzur, kan ou pou vini ? Dire nous, vine visite nous !*

Donc, mo toucher par sa et sa faire mo lizié et lécoeur déborder avec larmes, mais mo bizin dire zot ki li pas aussi facile, parski nous Jamaat, c'est-à-dire, le Jamaat Ul Sahih Al Islam ene Jamaat kot nous bane membres à travers le monde pauvre. Nous bane membres même ena bocou ki pas travail ; pour vivre même bien difficile pour nourri zot-même et aussi zot la famille. Astaire concernant sacrifice financier, très très peu ki contribuer.

Moi-même, mo bizin dire ki mo vivre avec l'héritage ki mo maman et papa fine quitter pour moi et *Alhamdulillah Summa Alhamdulillah*, avec sa l'héritage là, mo ena bane dépenses ki mo faire, bane zaffaires ki bizin payer. Mo-même mo dépense, dépense pour mo famille et *Alhamdulillah* dans sa ti l'argent là, Allah (swt) mette bocou bocou *Barakat* (bénédictions) là-dans, kot mo servi pour bane dépenses dans le chemin d'Allah. Là-dans, ena *Khidmat-e-Khalq*, bane programmes du Jamaat, paye billet avec mo propre l'argent pour alle dans bane pays et visite mo bane disciples et faire le travail d'Allah. Ena pays pé construire bane Masjeeds – pas zis dans ene pays mais couma ena lor nous website et youtube – et aussi pé construire bane *Madrassa*, l'école, librairie et nous bane membres – ena pays zot bien bien pauvres, péna les moyens pour faire le sacrifice financier.

Donc, ena aussi mo bane publications, c'est-à-dire, publications de tous mo bane livres, journals, *Al-Azim Tafsir'ul Quran* etc. – Si mo dire même la liste pour alle trop longue. Là-même mo capave dire trouve la grandeur d'Allah et couma sa révélation ki Allah (swt) ti révèle à moi là, tous les jours li réaliser : **« Si le monde quitte toi demain, mais Allah avec toi, tout avec toi, mais si le monde avec toi, mais Allah pas avec toi, nannié pas avec toi. »**

Sa c'est la révélation, *Alhamdulillah*, et mo bizin bien reconnaissant envers mo papa et maman pour céki zot fine quitter pour moi comme l'héritage. Mo faire bocou *duahs*, ki Allah (swt) donne zot aussi sa récompense là énormément dans *Aakhérat*. Si zot ti là, mo sûr plisse ki 100% zot ti pour avec moi et croire dans mo revendication. Mo dire sa plisse pour mo papa parski li fine quitte sa le monde là avant même ki Allah élève moi comme So serviteur, tandis ki mo maman fine croire dans moi et fine toujours soutenir moi, *Alhamdulillah, Summa Alhamdulillah*.

Donc, mo bane très chers disciples, comprend moi bien, et ici le Billet d'avion très cher. Ena bane pays péna vol directe, bizin prend 2 vols et ena même 3 vols, et sa coûte moi énorme. Donc, faire *duahs* ki Allah (swt) contigner béni sa Jamaat là et nous gagne bane dimounes ki Allah béni zot spirituellement et matériellement et zot capave contribuer énormément et kot Allah mette *Barakat* dans zot travail et business, kot sa capave rempli la caisse du Jamaat et kot sa soulage nous Jamaat bocou. *Insha-Allah, Ameen*.

2. Par la grâce d'Allah, par So faveur immense, de plus en plus de bane dimounes dans l'Afrique pé reconnaite la vérité, et tous ressamment – sa semaine là, nous fine gagne 2 dimounes bien dynamique ki fine intégrer le Jamaat dans ene de bane pays d'Afrique, et li bien malheureux pour dire, ki le Jamaat Ahmadiyya kan fine tende la conversion d'ene là-dans (mo pas pou mentionne so nom parski sa ene *Amaanat*, et du moment mo pou gagne so permission, c'est ensuite mo pou capave dire zot ki sanlà sa), alors bane là fine commence persécute li à travers so frère ki pé étudier dans l'université. Jamaat Ahmadiyya ti pé paye so l'étude, et malgré ki sa étudiant là toujours dans Jamaat Ahmadiyya, mais à cause so frère fine reconnaite la véracité du Khalifatullah et la Manifestation Divine de sa siècle, alors le Jamaat Ahmadiyya fine refuser pou paye pour l'étude de so frère ki toujours dans Jamaat. Kot ena sens là-dans ? Zot rode fer pression lor mo disciple kot zot rode fer tout le Jamaat et so famille tombe lor li à cause li fine rentre dans le Jamaat Ul Sahih Al Islam. Quel bassesse terrible zot fine rentrer. Kot « **La-Ikraha Fid-Deen** » fine aller ?

Azordi, administration Jamaat Ahmadiyya ena deux visages. Ene li présente li comme *peace-loving*, content la paix et prêche la paix, tandis ki so lotte visage – surtout mo pé cause pour sa bane dimounes corrompu ki azordi à la tête du Jamaat, zot persécute bane dimounes et zot familles à cause la foi. Quel honte pour zot ! Allah So machine en marche dans le domaine de l'Afrique et partout dans le monde kot So bane serviteurs sincères pé gagne persécution et pé passe par toutes sortes de pressions à cause de zot la foi. *Insha-Allah*, c'est Allah ki pou victorieux dans sa zaffaire là – « **Laa Ghaliba Illallah** ». Mo dire mo bane disciples, surtout bane nouveaux venus dans le Jamaat Ul Sahih Al Islam, pas perdi courage, pas perdi zot souffle, pense bane persécutions ki nous *Aka*, Hazrat Muhammad (saws) ti gagner, li, so famille et bane croyants, et azordi jours, tous bane persécutions ki le Khalifatullah même fine bizin passer. Mo dire zot, tini ferme. À travers sa, zot fine conne vrai visage de bane *Mullahs* dans Jamaat Ahmadiyya azordi ki fine corrompe bane l'enseignements de l'Islam, bane même enseignements islamiques ki Hazrat Muhammad (saws) et Hazrat Mirza Ghulam Ahmad (as) fine enseigner.

Ki Allah protège zot et zot familles, donne zot courage et soutenir zot par le *Ruh'il-Quddus*, et maintenir zot la foi ferme dans la vérité ki Allah fine accorde zot dans sa siècle présent, ene siècle vraiment béni, et c'est seulement bane « *Ulul-al-Baab* » (bane ki doués d'intelligence) ki pou comprend sa. *Insha-Allah, Ameen*.